

2

T5460/7244.29

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
FEB 18 1941

卷之五

登水鏡碑元驗三

行是

五言古詩

蘇慎

亭前新築樓閣化

彩何疑

新築

舞方

以

屈翁山詩集卷第一

哈佛大學漢和
圖書館珍藏印

鴛水徐肇元掄三選

周源長荆思

校正

徐起元瀛奇

五言古詩

詠懷

亭亭南海雲變化如遊龍朝冠扶桑日暮含閭闔風光
彩何熒熒降我蕊珠宮感子相羽翼飄飄至崆峒獲覩
軒轅帝心華開鴻濛萬象無遞形來朝寶鏡中雙成爲
舞女子晉爲謔童遊戲太虛庭誰能知所終
少年學神仙披髮羅浮戲麻姑愛玉顏爲作芙蓉髻簪

以明月珠拂以紅羅幌吹笛東南峰紫鸞來嘒嘒歡娛
會幾時人世苦流離君爲空中雲我爲機上絲將絲繫
浮雲纏綿安可期悠悠望蓬山終古長相思

過大梁作

浮雲無歸心黃河無安流神魚騰紫霧蒼鷹擊高秋類
此雄豪士滔滔事遠遊遠遊欲何之驅馬登商丘朝與
侯羸飲暮爲朱亥留悲風起梁園白草鳴颼颼揮鞭控
鳴鏑龍騎如星流超山逐群獸穿雲落兩鶩歸來宴吹
臺酣舞雙吳鉤驚沙翳白日垂涕向神州徒懷匹夫諒
未報百王讐紅顏漸欲變歲月空悠悠

清明展墓作

妖姿痛不留華年惜中天墓草根已陳松枝翳蘿蔦繡
牀所憐女魂魄何嬌小藥石弗能追相隨入先兆沈陰
日杳冥泉下無時曉憂毒能傷人吾將殉窈窕

冲虛觀

平生好嶠嶽所至棲丹丘太華雖言好未若歸羅浮冲
虛有雲構葛公所綢繆暗虎守洞穴碧雞松際遊石乳
滴入寒花氣隨風留仙璈奏池底月明聲可求髮晞籠
葱林手弄芙蓉鷗日月還霧虹元氣鬱不流研精在茲
奧吾且以銷憂

送鐵橋道人

十二慕信陵十三師抱朴十五精騎射功名志沙漠袖
中發強矢紛如飛雨電章句恥不爲孫吳時間學蹉跎
遂暮年喪亂成蕭索洗心向林泉所望惟鸞鶴瀑水與
蘿花飄飄夢中落

古詩爲葉金吾壽

英雄日已老顏色難長好昔爲張子房今作商山皓吾
將終羅浮服食惟朱草何以被四肢蝴蝶大如箕小翅
爲下裳大翅爲上衣何以作棲宿十圍籠葱竹一節爲
一房兩節爲一屋何以爲儔侶麻姑與玉女作使五色

禽紛紛煉珠黍何以充羽觴玄碧酒如漿飲之一呼吸
水露皆生香有友金吾子在豐湖洙吾令兩瀑布流
出桃花蕊桃蕊是丹砂君餐兼露華復有蝙蝠好雙棲
芭蕉花千年白如雪紅者如朝霞贈子白復紅佩之衣
帶中能令男女媚相愛長相同白以佩吾子紅以佩昭
容君姬字昭容黃帝昔成仙其術惟房中素女爲之師浮丘
爲之宮真人在玄牝出入如虛空日月一相摩光彩成
青童吾慕魯女生翩翩騎白龍仙成上太華毛女千人
從君今有窈窕左右爭芙蓉我亦容成子大道在其躬
相將且駐年紫髓而方瞳時來建勳伐乃追太保公太保

公諱夢熊
君之祖也

送王子從軍

太白天將軍夜來穿月出光芒一何長直使陰精失吁
嗟兵象見變亂將無日憐君虎豹姿自此難安佚子房
青雲士高尚素無匹一朝去從軍鞍馬如風疾經營羅
甸兵左右哀牢帥天心早能知王命多論述英雄方續
綏囊括須高密王侯寧有種廝養亦膠漆仲夏諸江湄
送君情洋溢離支堆玉盤花露甘如蜜半醉卽揚鞭乳
羊啖未畢慷慨辭故人故人多卓逸羊裘釣澤中亦有

男子

偶從風洞眺望始安山水賦呈秦使君

自我班師還永日遊山水城隅得風洞愛玩心難已攢
石多巉巖方圓亂相峙峰高易傾側崖落勢不止絕壁
窺天窗光從潭底起盤旋上松門狼藉踏花蕊蘿林外
冥鬱石乳中奇詭玉牀旣膏滑丹竈無泥滓驚瀨不因
風水石自相使飛溜吐復吞空響震心耳坐久機慮忘
一息歸無始終日介馬馳佳憩乃得此無人共勝賞竊
憶秦夫子解組初投閒老易重爲理用亢得無悔知足
自多社褰泝任所適淵默人難指留侯豈仙人導引誠
有以蟬脫帝王中功名同敝屣

哭內子王華姜

嗚呼我昊天降禍一何酷我豈兒女仁所惜親笑獨我
生苦伶仃以婦爲骨肉况是窈窕姿恩情日以篤三載
客將軍歡樂亦云足朝進紫駝羹暮聽秦箏曲卿家歌
舞多富貴非所欲攜手還丘園殷勤耕且讀老姑自汝
來歡喜加饘粥笑與鄰姥言新人顏似玉定省幾晨昏
孝聲聞戚屬凶變在須臾人理一何促哀叫天不聞有
身寧可贖

阿母年七旬哭汝聲摧裂當食不能餐喉間日哽咽念
爾萬里身艱難歷胡越暑雨及祁寒馳驅不暫輟關中
積高府風氣多慘冽我性不能寒疎理畏風雪鷓鴣向
日飛桂華以冬發自返南州來中懷少鬱結汝亦樂土
風所愁獨炎熱海氛多毒淫腹痛成天折倉皇醫未來
瞥已電光滅

炎州雖煙瘴珍果足娛子子慕離支漿能令顏色美可
憐未及餐倉卒歸蒿里自作翡翠釵自剪蒲桃綺簪服
幾何時棄捐篋笥裏汝生旣柔脆汝病復不已水土不
相宜卑濕損年紀家貧藥餌少天枉非天理痛哭五中
崩我罪伊何矣

皇天何不仁不念鞠子哀不念我君姑白髮方摧頽魂

魄今越散逢祭時一來我魂在姑前朝見姑淚漣我魂
在夫側暮聞夫歎息稚女未成人殯宮日匍匐我欲乳
潰孤鬼伯相催逼兒寒姑與衣兒饑姑與食勞苦今惟
姑姑將無氣力誰割我孝慈皇天不與直

汝魂母飛揚萬里隨悲風汝父爲國殤精爽在榆中汝
兄亦殉死黃口爲鬼雄游魂尚未變白骨可相從汝生
不識父死後見形容桓桓大將軍苦戰黑山戎左手挽
人頭右手持秦弓鬚髯怒尼磔流血被體紅黃雲野莽
蕩陰氣橫蒼穹前有無定河後有赫連宮父子驚相持
慟哭何時終

汝魂復何之汝母在朝那生時命奇薄夫死矢靡他孤
女藐始孩提抱出于戈伶俜未亡人被髮奔風沙汝小
旣偏孤汝大又無家自汝失天只骨肉成土苴泉下今
相遭煩冤訴無涯長城土慘裂黑水水峨峨巖風縱橫
起吹汝魂無多朝隨轉蓬飛暮逐驚沙過邊地雖故鄉
陰寒誰奈何母子魂來歸歸我羅浮阿

爾死作歸人我生何聊賴恍惚成狂癡魂夢思交會與
子合婚來別離常在外相見曾幾何一旦成茫昧兩載
共行役豈無飢渴害詩書相與娛爲道忘顛沛彤管我
能操雅琴卿亦解自古黔婁妻借老多年歲如何卿樂

貧獨不保少艾

淒淒燈火光照我空房寒
酒誰與飲彈棋誰與歡
徬徨淚橫迸不寐
茹哀歎衾幃不忍展
翰墨不能看學詩
雖未成才思已波瀾
風雅日絃歌書寫滿
齊紈薜華不終朝
玉魄難爲團
徒栽同本芝
徒種同心蘭
上天惡賢淑
使我成孤鸞
夢想何時衰
怛摧心肝

采采荼蘼花花露紅
以滋爲姜作面色
光豔使情怡之
南市石黛之北市
燕支芳香用未畢
蕙草忽先萎
幽鏡生紅埃
羅幃交網絲
笑貌若流光一絕
不可追
莓苔餘履跡
髣髴行遲遲
我有第五妹
與姜日娛嬉
梳姜墮馬

髻服姜月華衣
四妹嫁遠方
尚未覲容姿
今晨雨動絕

閨閣將誰師

西北多佳人
平生性所慕
馳俠至秦中
荷卿愛詞賦
朝共恒華遊
暮指瀟湘路
並馬榆關行
同車梅嶺渡
粧罷弄圖書
酒酣射雉兔
歡娛及閒暇
燕婉憂遲暮
我情日以柔
汝姿日以嬈
竭力媚閨房
不爲荒淫故
寧知忌憂花
一旦摧朝露
積想成狂疾
尋子向丘墓

相如還成都
衣裘盡貫酒
自刺美人賦
消渴恐不壽
臉際芙蓉花
誰知先速朽
幽歡惜永絕
盛顏難復取
筆牀銷翡翠
雜佩捐瓊玖
服玩盡棺中
箱簾無所有
同穴尚

無期我留爲慈母殉爾一鳴琴暫作黃泉友
我不忘大德爾毋思小怨自爾入家門飲食須相勸始
度臺關時我情彌婉變我鄉日已近汝鄉日已遠好言
相安慰不久還沙苑當奉白頭姑共隱華山巘居貧愁
懣多婢僕時驕蹇恭敬豈無違所恃卿良善織手所循
環女圖日不卷新頌伯鸞妻德音聊自遣篋中餘繡袷
顏色紅無損自今不敢視一任浮埃滿

贈徐處士

虎生而文炳鳳鷲已五色天性本自然豈以文章飾美
才忌輕出所志非官職諸葛騁龍光游步以自適亂世
無全臣欲仕非其國四方正雲擾大漢多蟲賊撫弦復
擲矢不射非無力荀彧王佐風從曹至今惜霜降草乃
成雪深梅始識與君松柏姿無苦歲寒逼何以結久要
艱難事潛德

讀史贈陳獻孟並送其行

秦季焚詩書先聖道以喪諸儒負禮器倉卒歸陳王匹
夫徒發憤曾不識興亡隱忍成功名何如張子房子房
非儒者爲氣何堅剛其終如魯連其始如荆卿平生予
所希君亦慕其狂終古兩盜雄蘭池與博狼少年雖輕
發氣實吞始皇君于太公書曾否得其綱先公有丘略

令祖麗南先生
著丘略百卷

揣摩宜不遑將飛且伏翼將鳴先引吭

何必魁岸人始能應帝王從容以步遊遊于淮海旁英雄無神師其學不光明苟能依老成以禮爲之方我亦倜儻人垂老猶摧藏漢初兩孺子不得與偕行強忍亦已久中夜起徬徨君今血氣盛甘苦未多嘗思爲日本刀須鍊梅花鋼屈伸能自如入石乃無傷行矣復遲遲咫尺卽相望

蓮花峰篇贈黃山閔賓連

我昔入秦關手攀太華峰千峰爲蓮瓣三峰爲蓮蓬三峰祇一石一石三芙蓉紛紛蓮花鬚化作千萬松白帝

與明星宮在千葉中高高五千仞仙掌擎當空自謂天下奇羣嶽不能從何意一黃山蓮花亦次宗一莖上轟天千瓣開濛濛從莖上至蕊吹墮愁天風盤迴穿巖竇忽見軒轅宮峰凡三十六此峰太華同夫君幾登陟身染蓮衣紅自作黃山經神與山精通文章亦巨靈開闢將何窮

江氏雙烈篇

鳳凰不孤生睢鳩無再匹姑婦苦相依歲寒同一室良人在泉下幽幽視皦日皦日久無光光自妾心出江家多女宗禮義爲琴瑟五婦垂管彤復茲叔與侄教子各

成名文章持篤實湘也更多才賢豪與膠漆劍氣如白
雲玉光溫以粟以母柏舟篇相示淚洋溢阿嫂亦陶嬰
黃鵠歌未畢安得聖人生列在變風一

蜀岡懷古

步出城西門盤迴見丘垤隋家舊宮殿林際尚明滅
國以荒淫雷塘乃無穴吁嗟美人魂風吹作蝴蝶玉顏
雖黃埃遺香托花葉英雄在白楊悲嘯亦嗚咽血爲螢
火飛雨中光熠熠地道通峨眉千里陂陀接幽幽一
泉中有古日月謂大虛無見玉勾洞府藏冰雪舉觴相
與傾慷慨中懷熱茫茫失路中痛飲誠賢哲

贈顏君

復聖之子孫大宗在曲阜峨峨司勳郎光與我知交久

曩者遊西秦聲詩相可否黃河石華魚華陰槐麴酒風

俗愛宗周酣歌亦擊缶洋洋風雅篇正變無不有夫子

昔刪詩先師顏子稱嘗左右三百所絃歌琴書滿窗牖

龜山與猗蘭二操亦在手子孫被流風德性嘗敦厚世

爲魯大夫文獻十而九宗器多珪璋孔氏稱甥舅光祿

之善五言人誦秋胡婦遺響在黃門推一賦如瓊玖司

勳正始聲此興無其偶賦詩存諷諫美刺絕不苟君也

爲哲兄墳篋如一口陋巷有神靈文章作淵藪分支去

溫陵禮樂遙遵守閩海接泗沂先學相師授公本濟世
才輝映桃陵後為政歷朔南聲教先孝友含吐黃鐘音
中和以自壽復聖乃春生一陽為物母以配復初爻龍
潛未見首元氣在素王司徒論語摘輔象云仲尼為素王顏子為司徒能多
取公也益含弘光大庶無負

詠古

日月鏡萬方精華在君子一虛而一盈以我為終始庖
羲至純厚畫卦順斯理神明所旁通日月乃文字平生
好學易精微性所喜未得大過無皤然已老矣

黃帝與重華在昔皆遠遊翩翩挾妃女翱翔窮九州黃

山有丹臺梧野有珠丘故都終不歸宮闕隨雲流帝
實神靈仙道未嘗求無為合坤乾禪受如春秋

神堯愛二女盡以歸重華長者為女君容顏如朝霞少
者為夫人亦若扶桑花袵衣被南風琴歌何紛葩朝同
蓬萊宮暮去瀟湘涯帝既崩蒼梧妾亦捐長沙神光兩
不離月以日為家

管蔡殷遺臣忘親以殉國武庚志中興忠孝皆可則天
命已去殷報讐終勿恤如何微與箕弗往為羽翼淒酸
麥秀歌迷民淚沾臆故都遂丘墟徬徨亦何極

秦繆伐西戎開地千餘里天王賀金鼓攘扈甚光美用

謫得繇余遂以霸西鄙不忍舍良臣收之同穴死身沒
猶愛才泉下須輔理哀哀黃鳥詩豈足知君子殺身殉
令名兼以報知己

之推昔從龍割肌啖其口文君旣升雲泥處功不有此
身得全歸縣上借慈母隱者焉用文躬耕日胼手環山
作湯沐報德恩良厚介山高入雲佇望以永久

湘纍澤畔吟亦似秦庭哭同懷宗國心夙夜憂傾覆自
古楚賢才二君最貞淑忠愛格上天大仇終報復三戶
節三閭亡秦在公族義帝雖不終諸侯盡臣僕漢興離
騷顯楚聲被絳竹高帝歌大風夫人和鴻鵠皆是離騷

餘哀樂同敦篤

相如琬柱時勇氣一何激一璧雖輕微如以國與敵澠
池相高會盤筦使秦擊頸血得濺王聞言盡悚惕威信
虎狼秦御史書功績知死則必勇智士以爲的

騏驥盛壯時一日馳千里臣精今消亡衰老詎可使白
殺送荆卿激之爲丹死燕中節挾多無能救太子狗屠
與漸離不請非知己擊筑和歌時相泣徒爲爾平生游
諸侯所結賢豪士曷不待須臾倉黃挾豎子慷慨爲羽
聲壯士髮盡指悲風何蕭蕭吹淚成寒水

維昔二周君皆以誅秦亡大義帥諸侯王朝亦有綱惜

哉無良將九鼎歸咸陽是時秦亦滅嫡裔止莊襄政也
實姦生呂代嬴氏興二世不旋踵趙高撼其吭前秦祖
蜚廉後秦祖文信無德易顛覆虎狼總推刃詩書亦何
罪儒生同一燼痛絕驪山坑多言說堯舜

陳涉奮布衣遂成土崩勢偏袒一大呼秦已無一匹
夫舉大名湯武若符契扶蘇雖當立詐稱亦非計將誅
無道秦師行宜大誓成敗在上天西向乘鋒銳毋示天
下私自王以微細爲秦多益敵六國蒙嘉惠入關令諸
侯功德可爲帝

倉海君何人家能畜力士金椎誤仲時秦王魄已褫報
讐雖未成天下兵以起功爲陳項先豪傑聞皆喜賊在
下邳中無人言孺子從容得步游任俠驚閭里老人教
疆忍命之下取履豈有王者師而爲血氣使

不忍殺沛公使之得天下英雄有至情難忘妾與馬
我實繇天知命乃無假慷慨泣數行實爲紅顏者王霸
如浮雲功名羞苟且倉皇垓下歌直可繼騷雅斯是國
殤篇三軍和者寡悲風起帳中殺氣橫原野河漢慘無
光痛飲過三竿自刎報父兄江東淚同灑善敗能從容
功亦在區夏

淮陰不悖漢忠信天下知可惜智絕人乃爲兒女欺當

帝至楚時淮陰能識幾相攜鍾離昧逃于東海湄棄王
如敝屣神龍不受羈遠追范大夫近爲留侯師豈非明
哲者超然有道姿

漢帝亦多情酒酣思猛士悽悲大風歌辭與招魂似韓
彭皆已亡慷慨不可止泣下爲淮陰非是悲游子刻薄
鍾室誅終古帝王恥忍以英雄人以與兒女子

漢高諸功臣項伯誰能似次則昌國君能全王父子大
封諸侯王亦及一雍齒如何忘滎陽紀信代之死君王
恩誼高豈以詐降恥滎陽與平城得脫以女子倉皇乘
黃屋誑楚一旬鄣

季布多戰功數能窘漢王摧剛以而柔得脫因濮陽朱
家不相負名聲聞四方滕公非在彼以爲漢求忠良從容
爲上言私怨以之忘廷叱樊將軍十萬罷橫行辭氣何
剛直殿上皆驚惶天下慮搖動生民尚夷創嫚書禽獸
言安足爭短長孝惠至高后兵革久不興實以季布力
海內得寧康

馬援處田牧有羊數千頭一朝散昆弟簡君聊遨遊光
武非人敵委身傾陰謀爲君取隗囂聚米成山丘移師
滅先零轉戰平交州男兒有汗血自當死戈矛馬革包
馨香雲臺垂勳猷悲哉武溪深三軍泣筓篲水崩船不

上淒涼臥壺頭用兵貴萬全塗有所不繇據鞍徒顧盼
一挫失通侯

乾坤造草昧狗盜方爭雄干將不善割勢與鉛刀同少
小習兵書慷慨氣如虹沈算貴先機羞爲汗馬功龍騰
階尺木鵬運須長風冉冉歲云徂衰髡如飛蓬王業尚
無始天心鮮有終淒淒梁父吟感歎將何窮

贈邳州季生

中原何洶洶英雄日暮時香餌引泉魚重幣購壯士嗟
君勇絕倫昆吾猶未試入獸而出鈴中道傷捐棄僥倖
成功名王侯久喪恥盜妬膾人肝仲尼不敢視悲哉聖
人才甲兵成虛器游魚脫深淵飛鴻戾天際貧賤聊娛
懷敦我箕山志

夜上灘江作

水落灘更高我船苦難上舟子聲淒酸榜歌不能唱天
寒白霧深川路迷蒼莽山月忽西東愁人苦相向霜氣
一冬乾水聲半夜長衣食分熊羆無金士難養久戍盡
鷲黑絕地無鹽醬所歷州縣多牛酒有誰餉微聞河中
語軍窮生怨望

古意

妾有大秦珠嘗含明月姿明月虧有時妾珠光不移朝

懸妝鏡臺暮繫紅羅衣君心不可照持此委沙泥願得
青鸞鳥銜將贈宓妃

夷光有寶鏡沉在若耶溪朝霞沐其彩明月揚其輝春
秋迭代謝菱花終不萎安得佳麗人持將照娥眉

落花辭故枝飄零逐溪水道逢浣紗人拾花置懷裏與
君同春榮相憐貴終始但願東風吹長墮機中綺

淒淒歲云暮蟋蟀鳴堂隅場苗不可食誰當維白駒伊
昔采桑女窈窕秦羅敷銀鈎挂柔條綠蕤映羅襦託心
自有所但笑使君愚

詠懷

驚風鼓松柏棲鳥羣翻飛開門望行人浮雲暮不歸種
桃愛其葩種柳愛其枝雖無歲寒用夙昔同裳衣魚目
亂火齊蟾蜍蝕清暉遂令金石交千里相乖違拔劍擊
盤石石碎劍亦虧感激將何言淚下空漣而

蘭叢盛枳棘鳳穴鄰鴟鴞利害日相摩金石爲之焦仲
尼探虎口跖也方矜驕仁義爲盜積天下誰宗堯驅車
以放志言觀東海潮波濤飛雪山河漢垂天櫛蛟龍隱
文章尾閭水潛消寧無百尺絲吞餌惟游鱗白雲來何
遲俯仰託長謠

山人酌流霞浮杯菖蒲溪笑我不肯飲容顏無光輝桃

花侍春陽松柏有霜威白雲多變化詎隨鴻鵠飛請謝
陰長生何戀紫房爲吾心似秋月皎潔誰能知

芳風起池塘花逐鴛鴦飛明月何娟娟爲君揚蛾眉請
彈石上琴更酌黃金卮蓬萊水已竭麻姑髻成絲芙蓉
自有英何慕松楸爲松楸凌霜雪虛名將安歸

陰陽迭遷謝人世悲蟬蛸命我雲螭駕逝將登不周飢
餐茗華玉寒披九鳳裘井水無大魚新林無長楸紛紛
彼婦口乃爲君子羞鮑焦已槁死強羸吞諸侯傷哉仁
義衰奸雄皆竊鈎仲尼無斧柯龜山空夷猶

初日麗垂楊朱樓臨大路纖纖彼女手當戶裁紈素雍
雍雁南遊遺音落滄洲美人恥歌舞篋笥疊衣裘衣裘
有時著孟冬清霜落皎皎薜華姿歲寒逾縉約道勝忘
紛華心遊貴恬漠

鴻鵠何蒼茫背負青天飛白波捲蒼海聲如鬼神馳予
時彈雅琴成連嗟不歸回風翻木葉斜日懸江磯淒淒
水仙吟中曲斷朱絲四望悄無人天吳方躩踞神物有
變化至人能推移拔山豈無力梟雄吾不爲慷慨髮衝
冠傷哉失路悲

出塞作

邊秋多風沙狐兔長悲鳴慷慨思奢牧因遊雁門營飢

食太行薇渴飲桑乾水問我亦何爲壯士不顧生生騎
一駿馬權奇如龍媒追風數千里直上單于臺東望朝
鮮江北望白龍堆凌颺發長嘯遊兵射我來左手接飛
鏑右手揮金鞭馳歸錦州城汗下如流泉念此血氣勇
毋乃非聖賢忍恥古所尚留侯亦迤邐長松寒逾勁南
金鍛彌堅啓篋讀秘書聊謝諸少年

贈遠

美人如花飛玉佩水綃衣長風吹欲墮攬帶前相持問
子遊何處笑含碧雲姿言我華陽來將從勾曲棲麻姑
久相待去去與我辭語卿且莫辭我有芙蓉池鴛鴦戲

碧葉翡翠巢金枝願將天上月長照雙蛾眉

贈山陰祁七

涼風吹竹篠攜手澄湖濱言持芙蓉花插爾華陽巾我
亦浣紗人明粧照日新何當上蘇臺一笑傾吳君明月
豈長滿朱華不再春徒懷陽阿曲寂寞度芳辰

送朱十

昨冬互寒時方舟同入越君望赤城霞我弄耶溪月月
出香鑪峰光搖東海雪美人吹紫簫一曲梅花發梅花
猶滿林君唱懷歸吟未遊雲門寺遽別天姥岑可憐雙
白雀相送吳江溇冉冉芳春晚桃李皆成陰貧女無刀

尺誰裁鴛鴦衾素絲亦易染孤鳳難爲音願言秉貞潔
黽勉同我心

和陳元孝登吹臺作

夙聞太阿劍霜鏘蓮花發楚王一麾之三軍盡流血夫
君事遠遊家貧一蒯緱千里登吹臺慷慨思報仇夷門
無監者誰爲公子謀我昔弔梁園所見惟林丘洪河崩
底柱蔓草連神州驚鳥縱橫飛離獸鳴相求平臺賓客
盡四顧淚交流憐爾多難人徘徊宮幕秋長歌蓬池上
擊筑睢水頭

別王二丈予安

美人在霄漢灼灼如丹雲手持鳳凰子母乃魏元君我
昔登太山天門嘯不還瀑布爲長帶浮雲爲高冠遊仙
豈不樂悲此市朝間聖賢恥獨善所貴匡時艱太阿苟
不割蛟龍將波瀾篋中有陰符吾生焉得閒平沙利馬
足驚颺宜鷹翰遙遙萬里心慷慨入長安

梅市別祁四丈季超

沈沈海月生嘒嘒寒蜩鳴遊子在天涯觸物生憂情賴
有二三友金玉同堅貞鼉鼉互變化神龍喪其形豈不
思奮翼上天無雷霆昔我別慈親王事勞孤征風雪歷
四載謀深竟難成黃蘗與春薺甘苦不分明至道尚可

信寂寞元生平

還故山作

誰謂客行樂歲寒無衣裳羈棲在咫尺悠悠思故鄉步
出稽山門乘春聊徜徉丹霞抱秀嶠珍木交迴塘水鳥
相和鳴窈窕皆鴛鴦人生道不存何以持文章苟與太
虛冥仁義皆糝糠南金一出鑛遂爲貪者殃長歎辭世
人飄飄歸羅陽

將歸省母留別諸友人

海上三珠樹孤鸞鳴啾啾養子羽翼成翻飛向九州九
州一何曠回顧生煩憂尋仙蓬壺中謁帝崑崙丘繁霜
墮百草瑯玕無晨羞慈烏能反哺鳳兮命不猶歸與守
故巢戢翼爲良謀

良謀一何有持道足娛親母爲天上月子如江中雲雲
月相終始流光誰與倫翩翩兩海燕挾雛遊青春銜我
蕙蘭花悲音何感人

感人惟楊柳飛花皎如雪如雪豈不芳所憂本根絕昔
我與親辭五嶽將尋師乃覲姑射人贈我青蓮枝青蓮
合爲丹能生明月姿豈敢自怡悅萬里其持歸

持歸明月姿皎潔無纖瑕朝含東海日暮膏赤城霞重
襲盤龍錦毋使蒙風沙以奉白髮人一照生桃花如彼

西王母長居太清家

太清何寥廓浮雲去不息呦呦野鹿鳴甘草不自食如
何舍友朋奮然思矯翼四海皆兄弟親兮難再得循彼
南陔間相思何終極

極望惟吳越吳越多山川玄豹藏深霧應龍蟠巨淵神
物必有偶磁石金相連離別雖須臾恩愛終不愆遙遙
骨肉情去如箭離弦

離弦去萬里烟波何渺茫朝與鳧雁羣暮隨明月光仰
視虛宇中衆星燦成行而我獨何辜乃爲參與商人命
在呼吸後會其無忘

後會庶不移參商有見時紅日生滄溟萬物蒙其輝矧
我體道人金石寧或虧颯颯霜下草熒熒園中葵敦彼
後凋質歲寒以爲期

和友人度昭關之作

端居苦離索思君蕪湖間忽聞昭關詠感激淚潺湲
夫不得志飢寒行中原斷髮投爐中爲君鑄龍泉器成
不見御雌雄各沉淵登高望四野亭障何連連驚風折
旗幟落日迷山川誰知遠遊子嗚咽不能言維昔吳子
胥吹箎誠足憐一怒覆強楚父讐不戴天解牛宜薄刃
驅馬貴長鞭苟能勤耘耔何必求膏田亮懷鷹隼羽時

至自飛騫勉爾慷慨人遙遙托贈篇

送鐵井子

葵生知向陽梅吐必南枝嗟爾遠遊子擇主將安之
玄水結大漠白日傾崦嵫懷寶不自銜所恃璠璣姿維昔
越溪女紅顏揚光輝采采五色絲織成歌舞衣朝詠梧
宮秋暮爲香涇嬉佳人重意氣一舉沼吳歸

贈別查德尹

君之父與兄與予相友善父也歲寒姿柯條蒙雪霰松
柏天所私青青長不變大冬愁凝陰微陽難與戰潛神
在九淵龍蠖誰能見我亦欵冬花苦寒相婉變春日未

載陽甘同萎草賤相別未幾時溘焉朝露先豈謂觀夫
君先人儼顏面髣髴黃鐘聲有光目流電肥瘠亦不殊
天形妙相踐長短爭秋毫鬣少亦連卷識者盡驚喜性
亦同狂狷文章若孔鸞珠毛相貫串黃者如金錢白者
如綃練自鑄偉麗辭六藝作釵釧吟言自迴環不嫁惜
嬋媛盛飭將有行未能舍環璫太素在中央絺繡四爲
緣易爻尚白賁詩風後繪絢先公所教勤夙夜惟經傳
明將于國雍寫書自供繕貽我外家語摩研當無倦

送五弟還里

子行歸故鄉劬勞將父母雖無金滿籩有友貽瓊玖吳

越多秀民襄陽足著舊稱詩相歡娛爲情若醇酒謂我
兄弟賢無忝三閭後攬執芙蓉袂纏綿大道口

答李緩山

昔在建陵時與君嘗不寐干將徒出匣宰割難自試紛
紛駑駘者千里先騏驥君擊唾壺缺酒酣益涕泗神勇
笑荆軻乃爲燕丹使不與漸離行七首無成事沉沉夜
漏長棋局消神智英雄亦反覆一子勿倒置亞夫苦持
重諸軍患兒戲烏合取勝稀皇皇徒逐利壯心一日暴
十日寒頻至拂衣沔陽湖君歸如脫屣賦詩向白蘋垂
釣持芳餌雲夢吞吐時洞庭爲酒器遨遊至五羊尋我

屠沽肆相見卽言易剝極見天意乾坤一碩果萬物所
從始貴以土德厚栽培無老穉相望及春陽雲雨同行
施

爲陳母姜太夫人壽

夫人年七十有子才且賢迢遞八千里顧我東臯田愛
親及我親仁孝情相宣左持一白鷺右持一豚肩僮僕
奉樽酒酒乃惠山泉爲母千金壽申以南山篇感激仲
子賜光生深井間忠養方有愧敢當不匱言惟君能錫
類施及恩纏綿我欲壽而母無物致拳拳惟有一片石
可以明貞堅令子珪璋質攻之期不偏友道在追琢所

以娛高年夫人百齡時我當來幽燕跪將吾母命並生
肉芝鮮今且養鷄雛待之啣綵箋

采藥西寧承張大令使君命其姪孫豫表陪探
燕子巖大峒龍井諸勝

瀧東與瀧西巖嶂蔽天起瀧西林木深窈冥數百里城
與白雲爭所得尺有咫猿鳥欺吏人蜂巒壓廳事開闢
未百載夷椎尚多鄙使君造草昧雷雨自茲始仁聲務
洋溢文教期光被我來聽鳴琴泠泠非山水先王風未
絕咏歌日盈耳相賞在無言唱歎亦有以郊坰富丘壑
先導命猶子楓葉作香飯笋籃代玉趾衣裳濕嵐翠杖

履沾泥滓石窟俯身入洞天穿地底絕壁攀莓苔幽叢
掇花蕊奇葩愛無名大藥疑不死猴薑旣蔓引鳳笏復
披靡蘭青翡翠同竹大籠葱似松栝互支柱磨腹或騰
倚鬱雞驚出林白鷗翳其尾山鵠解媚人孔雀可驅使
飛厓畏足踐盤石若棋累方圓競相疊大小皆竦峙鬼
神所盪踏風雨或遷徙陟高眺錦石特立牂牁吐玉表
何峩峩翠屏復几几漢臣昔封植功可銅標擬蒲桃裹
宮錦五采絢岊岊瀧西風望秩山宗實在此羅旁九九
曲勢至咽喉止洶湧千萬嶂所賴一柱砥使君天下才
今乃在蠻俚亦如陸大夫區區至交趾峻極持崧高英

靈作南紀注以洪河流波濤沃瘡痂恩膏隨沓潮以及
我桑梓湯沐不在多錦石亦可喜肯錫一陂陀當盡樹
蘭芷來爲瀧西氓殷勤負耒耜

登羅浮絕頂奉同蔣王二大夫作

蔣少參莘田
王給練黃湄

霓霓太古雲至今未開闢山氣日洶湧隨風灑精液觸
石生洪波微茫在咫尺登山若浮海舟航卽輕策浮山
復浮去與羅萬里隔僅餘玉女峰娟娟在肘腋蓬萊無
根蒂在股長爲客鐵橋苦拘繫峰峰合體魄一氣膠漆
之洞天在肝膈雷風吐噏時氤氳相損益我袞在虛無
盪踏難留迹如何太華山乃爲巨靈擘便道通句曲大

天有阡陌玉笥一南竅日月暗相射朱明本火府草木
多純赤朱竹含葳蕤紅翠美毛翮南禺亦丹穴鳳族以
千百口銜芙蓮花紛紛墮瑤席珠尾若揚麾往來拂巾
烏麻姑何秀峙散髮至腰脊上下飛嶸間不肯相扶掖
筋力盡青冥漸與空天迫微軀若鴻毛順風思一擲衫
袖卽飈車不用浮丘伯神明自鼓舞鸞鶴惟所擇便攜
二大夫八極恣揮斥神仙雖恂悅此中有窟宅真道苦
無言與天日相索聰明乃塵垢陶鑄有微責雖復遊無
窮亦自悲人役神仙有離合依依且朝夕鰲首或浮沉
廣大日以積彌縫費造化隨波恐流易分水一泉源自

天通地脉瀑布縱橫飛與海相潮汐天雞一呬喔扶桑
日半白海日長三丈玄黃始一隙光明未麗天外體已
赫赫搖蕩二石樓燒空如琥珀生長暘谷傍鬱儀日親
炙中夜已寅賓導引成肥碩咸池灼欲焦滄涼吾自適
一下曜真臺人間愁踉蹌百慮生黃埃世務嬰繁劇三
山居水下船交苦風逆齋去童男女三千良可惜羅浮
卽方丈甘心自古昔南嶽一佐命仙卿此註籍大夫代
天工於此宜區畫雖無封禪書名山望潤澤

松上蘭

在全州赤
蘭舖中

蘭生乃無土托根高松端爲君作蘿蔦青青同歲寒馨

香在天半無因充玉盤嗟爾寡芳人盼望空長歎紫莖
何嫋嫋綠葉何反反但見白雲覆安知清露溥嗟彼生
沉湘枝枝臨江干行人得采擷持以成幽歡一朝蕙草
晚棄捐同齊紈雖蒙置箱篋詎異塗泥間

送張超然返虞山

去年春上巳送子珠江南願子尙峩舟上無檣與帆今
年小寒食送子珠江北願子萬里身上有雙飛翼三歲
別妻孥夢中見顏色吳下一春人鴛鴦苦無力嬌女未
扶牀呱呱在錦臆游札有遺風伯鸞所朝夕昔家梧宮
傍今移拂水側言公昔浣衣有石方且直夫在石東耕

婦在石西織節節皆爲雙白紵充衣食裁成一明月皎
潔終何極

言公謂子游也子游有浣衣石在虞山下

行藥城東作

仲春已清和逍遙可行藥炎州多靈草勾萌先咀嚼采
蘭者誰子邂逅當林薄無營似白華無欲同朱萼綠葉
與紫莖平生所磨錯微雨土膏滋木根遠相索其旁石
菖蒲尺寸瓊瑤削紫茸何葳蕤九節含風弱安期所服
餌玉顏以灼灼秦帝於我求蓬萊奮雲躋千歲與君期
神仙多戲謔橋下流潄潄少君與斟酌

安期君常與李少君采菖蒲酌

潄潄水于廣州城東

過涿州作

樹木何颺颺黃雲千里愁日月爭馳驅民生誰獲休置
酒華陽館五鼎烹肥牛太子捧金卮美人彈箜篌數石
不得醉悲歌恨仇讐歌舞歡未終將軍刎其頭驚風起
燕臺滹沱咽不流男兒得死所其重如山丘白刃若春
風功名非所求

贈朱士稚

神虬樂泥蟠鴻鵠安紫荆飛騰亦何難所貴忘吾形子
房久破產一身如浮萍英雄不失路何以成功名高歌
送君酒詞采鬱縱橫神仙爾何愚猶未齊死生明月在

卷一
三
滄海光華虛復盈母懷千歲憂酣放聊沉冥天地一塵
垢吾心獨太清

與諸公別于西陵

浮雲何瀾瀾導吾將何之徘徊西陵路與子牽江離江
離久不芳佳人無衣裳烹魚貴神鼎酌醴宜鸞觴鸞觴
君不御別恨吳天長參辰日錯行龍虎不相望我無四
澣羅何以獲鸞鴛楚歌爲羽聲壯心空低昂君子握神
氣小人重文章去去且揮手久要願不忘

壽母

我生遭喪亂周游悲道窮髮膚雖至昵相依不克終子

春難全歸豫讓靡成功仰辜昊天德俯愧白華躬茲辰
介春醴瓶罍無光容捧土塞津盟吹琯回條風微志苟
不移庶可慰尸饗

朱陵有藥市我父爲韓康東王教服食仙去路渺茫遠
瞻松檟上近察几筵傍神靈何倏忽令母早年孀白雀
思令威黃鵠悲陶嬰悠悠聖善心與我旻天長母子相
流連如月在滄浪滄浪水清澈所以娛娥光

母寒裁複禪兒寒持熨斗隆冬天雨霜清苦徒相守借
隱似綿山躬耕無谷口今朝逢令辰何以介眉壽鑿冰
取嘉魚采蘭爲肥牡堂堂子處子被褐懷瓊玖不義如

浮雲豈足娛諸舅

青松冒霜雪歲寒希陽春仰絕高天覆俯憑坤厚仁婉
變懷袖間藹如狐白溫尸鳩未均養所嗟俱貧辛長息
刺繡文次息倚市門終歲何劬劬錢刀無一存龍綃匪
冬衣燕麥匪朝餐徒持孺子顏嬉笑相承懽

葳蕤三珠樹上有孤鳳皇凝神慕姑射堯舜如糝糠大
子歌離騷中子進椒漿小子射白鹿爲餽陳高堂勤勞
文伯母勗以追珪璋日抱金烏飛月懷靈兔翔精華相
呼喲爲命與天長

西王有青鳥奉使何溫恭朝登麻姑臺戴勝相隨從中

婦獻綉襦小婦調絲桐阿母樂欣欣飲酒顏鮮紅三花
結護草千葉開芙蓉念我托神仙不昏如青童幽幽匏
瓜星獨處銀河東

羅浮五色鳥絳翎是君王生男爲鴻鵠生女爲鴛鴦嗟
余有兩妹口噤難銜將風雨日漂搖嘗憂巢穴傷侯光
方賃春令暉日縫裳窮苦不遭時令母愴中腸壻貧若
珠玉女淑宜糟糠庶幾抱潛德來共拜嘉慶

神龍何光彩乘道而浮游非陰復非陽歸我太清居暮
如蓬海月爲母掌中珠朝如扶桑霞爲母身上襦天下
乃塵垢真人色不渝雖無人爵榮其樂如華胥願親且

安坐清琴聽徐徐

遊羅浮作

隆從兩靈嶽佐命于祝融蓬萊浮海來與之合鴻濛曜
真祕陰室朱明開陽宮夜半海日飛搖蕩石樓紅石樓
夾天起雲氣流如水日出見仙人玲瓏水簾裏迎我四
百峯蝴蝶大不已裊裊鏡橋垂欲度愁風吹白雲爲羽
翼一舉將何爲蘇耽尚有母萊子亦有妻潛龍寧勿用
雷雨將乘時麻姑有酒田聊自耕紫烟搗藥命紅翠流
杯持寒泉歡娛可因物變化寧在天

遊黃龍洞

洞口花縈迴微磴在溪水交瀑絡峯腰積翠明潭底倒
影麻姑臺一望成霞綺白石合金沙紫蒲吐瓊蕊羣峯
稍開豁露雲泱漭起坐愛盤石廣卧欣芳艸靡天華尋
遺宮蒙龍餘葛藟歌響散天飛舞塵逐雲委興廢祇終
朝割據一何鄙英雄寧無成不奪兒女子混沌留吾年
蟬蛻帝王裏洋洋風珮飄天路從茲始

宿寶積寺

行緣一瀑布高上層峯端蘭若冠青壁松林鬱巘岫光
霞舒丹氣暄風凄微寒錫杖有神溜噓吸漱潺浚衣裳
何飛飛隨風上檀藥洗藥尚未畢長嘯凌天門孤生悼

已宴妙志矢無諼沮溺雖隱約松喬共盤桓日暮聞鐘聲聊與飛鳥還

進帆石門懷古作

洋洋犇犴水萬里番禺通百川灌其西三江潄而東分源白夜郎合流趨鬱銅勢束高要嶮聲奔昌樂瀧春膏漑雄田夏漲挾舊風滔滔安所歸溟渤朝祝融崩波吭一門噴激爭其衝竦石盡壁立沓潮聲相舂我舟朝溯洄暮猶雙闕中飛峽有驚瀑穿林多橫峯耽茲山水勝挂帆時來從樓船想楊僕策畧懷唐蒙奇道乃自泄偏霸知將終裸國亦稱王矧爾臣佗雄中華當拓境揚越

先成功前軍尋陘破後騎石門攻蠡爾一州主漢爲天下宗

送陳中洲

白髮穢光儀年華亦已暮如彼蘭蕙芳離披向霜露子才逸卿雲復有鸞龍度慷慨泣明珠光輝誰不顧吳越多知音而今重詞賦聞子父兄名新知盡成故行矣路方長時時望丘墓莫卽學蘇耽仙成上烟霧

送程君還歙

容成與浮丘毋乃非神仙御女教軒皇徒爲後世傳君今返黃山一手携嫵媚莫上丹臺峯長跪天姥前素女

安可師大道貴自然鳳皇不下地鴛鴦不上天甘瓜相
鈎帶生子期連綿况君美天爵將爲用世賢文章有奇
氣金石能相宣

鎮海樓

渺瀰祝融汪嘘噏鵠火房房中一都會番禺爲紀綱二
山雖卷石亦爲南嶽宗層樓何穹然作冠玉山岡五重
若棋累勢與雲低昂屹屹出崇堞盤基何堂皇絕地無
根株莖臺四相望虛無若唇氣含吐朝霞中日月互穿
穴玲瓏貫榑桑飛檣裊千尺懸棟森成行隨風或遠近
嶽立仍中央神明所憑依奠我勾蠻疆樓南何所見牂

荆浮青蒼萬里作南瀆崩奔從夜郎三江滙驚濤海珠
扼其亢浮沉一地肺險若三門當潮汐苦相杳秋鹹水
益漲魚蟹負陰火與蚌爭胎光水怪紛往來一一交精
爽番舶逐鰲吐儵忽非乘風帆穿吞舟魚自口出中腸
自謂黑山中安知非溟洋瑰貨所委輸輻輳交三城小
者牛頭船大者獨木檣我艦空飛雲莫敢與頡頏紛紛
白黑艚視之猶鳧踰樓北何所見白雲連北邙蜿蜒自
衡嶽孕精岫嶮峯丹臺蠹鶴舒石室開龍驤菖蒲翳溪
路蔥蒨陰苑墻薛薛流花水鬱鬱扶荔鄉地肥宜蓄牧
駒駝與羝羊鳴菰歸紫駝吹角來黃麇水艸勝朔漠甘

美無鹽霜馬食多禾苗漚乳成酒漿人頭嶺已平溝壑
無餘香白狐旣悲嘯黃狐復跳梁人膏作青燐白晝迷
陰陽松柏何蕭蕭魂魄吹無方樓東何所見扶胥祠谷
王海口控虎門諸蠻多梯航紅毛知荷蘭黑齒惟越裳
戰退鬼樓船白丹幸無傷人魚旣醉飽洪波爲不揚斷
虹一相假颺然踰零丁陰墟廟貌尊黃木犧牲芳百川
爭東朝水帝紛來享樓西何所見靈洲砥湯湯潮來石
門闢鬱水喧魚梁貪泉日潰決滔天誰隄防仕宦寡廉
潔蹄涔爲之殃一飲喪吾寶腥臊德以彰不祥茲盜泉
沛然南海放生民骨髓盡爲患何時終樓上何所見南

戍垂精芒五星東井環越門蒙餘光趙佗以偏霸與漢
爭雌雄客星出牽牛士燮亦奮興人流紛依歸苟安免
夷創月食牛女間劉晟以隕亡熒惑入南斗建德喪其
邦南斗越司命自昔多灾祥上天苦懸象占驗誰能明
所希老人星常見吾閨庭壽光盛秋分俾我尊母康再
拜向南極配月如長庚長庚何依依爲予當丙丁樓下
何所見南武餘離宮倔強乃朝漢朔望茲迴翔老夫反
天性一州安足強椎髻祇自外竊據誠何功苔生呼鑿
道艸沒瘞劍場木棉拂綺蔬參差連赭桐枝枝女珊瑚
葉葉山鳳皇糞香越王身銜穗仙人牂牲牲茂林下蹲

倚當丹牀是爲羅浮麓朱明此潛通仙靈所窟宅我來
每徜徉不揖安期生卽拍浮丘公招手登茲樓攬執雲
衣褱御風復何待飄颻明將行

送家舍人

白雲何蓬蓬朝別岱山中豈不念本根仙人在崆峒似
君久流離萬里思從龍天心未厭禍顛沛將焉窮厲夜
得寶劍安知雌與雄雄能制諸將雌亦至三公贈君及
壯年往取留侯功

送妹

青陽屬令辰來雁鳴雌雌朝雲媚桃李乳燕棲房櫳窈

窈彼君子佩玉乘青驄朝爲孤鴛鴦暮作雙飛龍子懷
在高逸偕隱宜梁鴻絺綌勝鮫消荆簪玳瑁同箱簾無
寶玩圖史盈其中芳顏匪膏沐令德維溫恭先人箕頰
流卮勉追素風

出永平作

洪河無停流驚枝無栖翰志士生亂離七尺敢懷安青
萍不刈黍明月寧沉淵斷袂別親友成敗俱不還誅秦
報天下一死如泰山寶馬與美人烏足酬燕丹驅車出
廬龍迢遞度渝關二水交灤漆千峯連賀蘭征蓬自迴
轉去雁羣飛翻悲歌弔飛將聲振長城間猛虎爲我嘯

玄猿爲我歎奚兒動成羣
箜篌對月彈彌令遠遊子側
聽心哀酸

登軒轅臺作

邊風起薊門黃雲高
嗟峨予登軒轅臺四坐發悲歌
哀哉帝王都城闕如丹霞
朝陽開露掌閭闔搖金波
碣石懸天柱桑乾接銀河
真人茲建極億載詎云多
誰令羽林兒一旦倒長戈
遙遙關塞路朝暮驅橐駝
橐駝安所負美人如桃花
淒淒當落日莽莽揚風沙
龍髯攀莫及玉女舞婆娑
天庭方宴樂寧知予咨嗟

贈友人

英雄惡割捩拂衣遊江湖
我爲沈水香君爲博山鑪
紫烟湯光彩丹成凌仙都
仙都雖宴樂蒼生嗟未蘇
紅旗如雲霓錦帶曳芙蓉
利劍在掌中出入風雷驅
蕭曹刀筆吏項羽乃匹夫
苟能拯水火何辭七尺軀
王侯如敝屣山林堪長娛

煌煌我上天照此豺虎驕
我無戈與矛何能入山樵
石溪流濺濺蘋萍隨風飄
游魚畏鵝鵠神龍樂波潮
仙童顏姣好迎我雙瓊簫
東遊扶桑闕西渡絳河橋
至道非無形如月懸中宵
攬之盈玉手欲贈彼嬌嬈
人生如電影千載不崇朝
念彼牛山涕乘化且逍遙

寓山園弔祁忠敏公

園林午澄霽左右芙蓉披浮舟弄清曠遂至鏡湖滑陽
崖雲方散陰峰露未晞再拜清冷淵淚下沾裳衣吁嗟
懷沙人守道無委蠅築宮水中涖蘭橈鶯粟楣金蠻開
彩翠玉漏滴葳蕤方懷安石賞遽與彭咸期皇輿已敗
績髮膚何以爲浩歌赴長湍溯洄從九疑容與凌明霞
觸石體不隳怒潮爲安流靡濡魚鱗衣我祖維靈均冠
劍鬱陸離夫君交手去重華以同歸玄烟橫極浦衝風
激寒澌投篇涕洟瀾日暮感舟師

酌寒泉作和人

朝飲貪泉水暮逐貪泉流廉夫不可爲仁義皆竊鈎天
方授盜跖吾介徒罹憂合浦多明珠朔漠多貂裘仲尼
思執鞭况我斗筭儔

咏古

漢皇有神器光明長盛實白氣鬱成雲狀若龍蛇出太
白精所凝一揮天下一自斬白帝子血光嘗如漆本以
詐力雄湯武非其匹猛士無韓彭四方豈寧謐威加海
內歸霸圖有得失慷慨泣數行悲歌風瑟瑟時無周旦
才誰與陳無逸

諸葛王佐才乃慕樂將軍燕昭本姬姓豫州亦懿親齊

破將尊周霸業爲桓文爲燕振積弱周命亦維新天王
威一奮六國仍爲臣燕號爲宗國西向制強秦孔明爲
劉氏與樂同一身帝蜀豈本懷漢業徒三分悲哉孝獻
沒一日能無君元年紀章武掩淚當秋旻

贈友

我本接輿流披髮歌鳳衰時無魯仲尼狂簡將何歸六
經久榛莽諸子多淫辭嗟予非先覺斯道將陵遲狂瀾
思砥柱疾風宜勁枝嘉子方少齡顏閔能爲期直如麻
中蓬皎若霜上曦烹魚爲漑鬻射虎爲張機堂堂並爲
仁棄我莫如遺

古詩爲王將軍壽

將軍學淵府日與諸儒遊縱橫飛文雅藻思紛雲浮大
帳開朝臺道德爲戈矛清辭若飛兔超山越海陬伊予
乃駑駘龍驥不可求首夏氣清和衣袷臨河洲酒糲干
金壽主賓交獻酬十丈攀枝花朶大如觥觥注酒鬚髮
中百壺爭川流玉女笑如電紅口不能收壺矢一再行
雅歌相綢繆願君似山丹顏渥無春秋歲歲珊瑚林持
以爲觴壽

周翁山詩集卷第二

鴛水徐肇元掄二選

周源長荆思

校正

徐起元瀛奇

七言古詩

送韓石畊

我聞黃山有湯泉軒轅浴之飛紫煙瓊樓珠闕萬峰連
瀑布爲梁度羣仙白雲瀾漫如滄海丹臺石笋忽不枉
天風吹開金芙蓉中有日月紛光彩送君歸去餐日華
桃花片片是丹砂三日容顏如玉女却來同我登青霞
上千尺嶮百尺峽至溫神洞宿

十八盤盡見西峰遊人匍匐上芙蓉攀援鍊綆數千尺
身似飛猿時一擲陰陰天井上穿天裊裊石梯懸度石
神爽先飛玉女峰嘯歌暫憩羽人宅月中明滅白雲流
風外砰磅瀑泉激咫尺翻愁帝座逼吐納聰明慎今夕

華頂放歌同王伯佐

太華峻極惟南峰脚踏萬朶青芙蓉東西二峰尚匍匐
白帝上宮不敢卽天柱搖搖風欲傾元氣茫茫日無色
我行飛棧若驚鴻君騎搦嶺如游龍君過玉女飲三漿
我向將軍攀五松狂嘯翩翩凌絕頂目營四海神光騁
水簾高捲入珠樓蓮葉深披探玉井黃河浩浩瀉愁心

明月蒼蒼逐孤景塵垢猶堪鑄帝王清虛何足留箕穎
形勢依然天府雄龍爭虎鬪誰途窮千里金城收一掌
萬年甘露待重瞳

王允塞招飲竹林精舍醉賦

黃神峪口開精舍蕭蕭樹石流泉瀉主人觴我竹林前
與客七人成七賢曠達誰能拘禮數豪雄不屑居神仙
嬌歌急管且流連蛾眉相妒不相憐蹇者欲斬平原妓
蔡經難受麻姑鞭醉來飛馬直上天蹴踏華峰十丈蓮
人間萬事如塵煙我乃酒狂合自然請君無爲醒者傳

長春石室

有序

華山雲臺峰側有長春石室唐貞觀中道士
杜懷謙之所居也懷謙自號長春先生好吹
長笛令人多買笛一吹之輒投于巖下笛盡
更供今石室巖然笛聲猶不絕云

長春先生好吹笛吹之裂盡華山石一笛持來只一吹
歲用琅玕數千尺一吹卽復投巖中笛與人間製不同
人間不見長春笛惟聞笛聲滿碧空仙人自古重音響
吹使乾坤氣清爽一曲中和致太平遺音千載穿雲上
我向先生石室栖每尋長笛臨迴溪願作仙人笛弟子
朝朝吹徹雲臺西

辛亥仲秋夕作

去年月比今年好嬌女如花在襁褓手持一物笑當門
柚子燈紅如瑪瑙前年月比去年明內子新歸自鎬京
畫舸朝維楊柳嘶香車暮入鳳凰城盤中果愛甘蕉美
檻外花憐抹麗清稚子爭圍秦弄玉慈姑似見許飛瓊
今年月色如水凍獨坐簾前抱哀痛吳宮紫玉遂成煙
巫岫朝雲元是夢幽魂不返月支香仙脫已藏毛女洞
淚落黃泉知不知黃泉少見月明時難將一片天邊月
長照黃泉冰雪姿黃泉母子應相見見此月明淚如霰
人間月似白玉盤地下月如白團扇團扇光輝乍有無

愁君失路一身孤夜深環珮歸宜數莫向黃泉空望夫

壽汪虞部

南陽老人漢郎官七十面如紅玉盤家近浮丘丈人館
御女早得軒皇丹二十羅浮大蝴蝶紛紛出繭食花葉
山人言是小鳳皇五色之鳥爲臣妾有似君家諸小郎
三歲四歲初扶牀琳瑯盡是天廟器神仙之雛不可當
君今垂老多歡樂左鬢會應生肉角著書已富內外篇
采藥還期南北嶽從來大道貴傳人長生有術予將學

陳丈種花歌

丈人無事惟種花花開紅白如明霞朝從花市得金錯

暮向花田吸月華花中一樹綠萼梅下有水仙數叢開

水仙乃是秣凌得綠萼元從羅浮來願作羅浮大蝴蝶

與君朝朝食花葉願作羅浮五色禽與君暮暮宿花林

秣凌花如山亦復花如海清涼海棠大十圍吉祥古梅

自六代不及君家此園春千葩萬蕊飛成茵開來只抱

丈人甕隱去誰知漁父津自結一亭小種蘭花四繞冬

有芙蓉亦有桃絕喜嶺南霜雪少花落爭來釀酒人花

開早至收香鳥往時朱叔賢種花禺陽邊殷勤葬落花

處處成花阡與花共生死好花成神仙君今落花棄不

可日日掃來盡與我

朱叔名學熙清遠人丁亥秋以庶嘗殉節嘗以苦窰器葬落花于南

馬黎太僕遂球
爲作花肝表

東湖篇贈高明府

柳絲柳絲長復長雖長難繫紫鴛鴦鴛鴦飛逐落花去
使我攀絲空斷腸使君欲執鴛鴦鳥來向東湖臨浩渺
更憐魚尾紅筵筵不惜竹竿長嫋嫋佳人忽自羅浮來
中有梁陳多麗才雲霞被服三銖剪蝴蝶文章五色裁
風流攜得諸妓樂娥郎一曲傳邊朔十番大小更誇人
諸童新就吳儂學使君淵雅最知音邀下樓船更鼓琴
章句離騷殊未已絃歌三百一何深公餘祇欲尋高士
荷葉荷花映人吏著書却笑葛稚川虛無但道神仙事

壽霍丈

天上有壽星飲酒輒一石人間有酒龍爲壽亦過百君
今六十興翩翩夢想廬山醉石邊講學十年稱祭酒隱
居雙嶽得飛仙山禽吐錦當晴日海氣成樓在曉天杖
策逍遙無不可酣來更拂落花眠

寄贈高博羅

使君昔宰羅浮西訟堂水接羅陽溪使君今宰羅浮東
浮碇高岡在縣中羅山爲主浮爲客羅與浮分峰四百
使君豈亦一仙山長與羅浮合精魄爲政風流近若何
著書應比葛洪多仙方不屑言黃白王道惟知保太和

我別羅浮亦已久從君欲出飛狐口不似浮山有所依
長與朱明爲戶牖當年著得羅浮經欲待功成勒翠屏
使君詞賦應多載留照山中御簡亭

廣陵篇贈別吳鹿園

江北煙花是廣陵江南山水惟京口蕃釐觀左一逢君
欲典衣裘取清酒飛橋十五首紅橋夾岍蘼蕪漸及腰
才子偏來明月夜美人不見落花朝蕪城一賦君能續
更有冶春三十曲千載知音是紫薇竹西歌吹傷繁促
哀怨猶多楚性情荒淫未變吳風俗山中雖有玉勾天
日月長舍第五泉兒女但能催白髮英雄那得再青年

題吳太守江山清嘯樓

在真州

江南山色渡江飛飛向君樓含夕霏空翠不隨流水去
鴻濛忽化白雲歸吳興太守真州客日夕捲簾蕩精魄
舞影時翻天女花歌聲欲裂雷公石浮玉雙峰駕筆高
芙蓉一朵一離騷六朝春色爲膏沐萬里天風且羽毛

過黃俞邵藏書樓作

我生南海愁偏僻經史之外寡書冊扁舟遙至金陵城
欲向名家求載籍黃君父子世藏書一室嘗開萬卷餘
欲使文章歸性命豈將詞賦送居諸六經我道非糟粕
天地精神於此托一畫能令日月開古聖神明必有作

君家易疏幾青箱借我無嫌歲月長卦外始能知太極
圖中亦可得羲皇君今繼述從何始應徵未與先朝史
文獻無稽是此時春秋有志惟君子秦淮水長連青溪
三月河房柳向西欲邀雪客同揮管吾學諸編更整齊
我且濃磨方氏墨殷勤花下爲君攜

觀雲公所繪聽松圖爲葉平仲作

黃山之松天下無雲公寫入洞庭圖松聲捲起瀑泉水
散作天風落五湖洞庭東西二峰好玉柱金庭棲綺皓
當年縹緲莫釐間我亦行攜石公姥葉子幽居偃蓋陰
身如菟絲纏松林興公齋前已楚楚華陽樓外還森森

拂地參差多塵尾無生日說如流水聲飛天外不因風
千里蕭騷猶在耳雲公最善繪寒聲聲自空生亦有情
嘲嘈忽似蘇門嘯諸會琴音滿太清

送客上廬山

廬山之奇在瀑布飛流千道穿雲樹峰峰皆有呂梁洪
漁父濯纓予濯足送君直上芙蓉屏俯視天河若建瓴
狂來莫點神龍眼恐挾風雷下四溟

題欽子五芝圖

二十四種黃金芝我昔羅浮皆采之此芝一莖五枝秀
君今圖此將何爲君能服食自不老丹砂不若紫芝好

園綺當年餐紫芝容顏得爲君王保

爲王璞菴題騎白鹿圖

白馬小兒竊天祿青牛老人去函谷君今白鹿行翩翩
豈爲茅山高臥足乾坤此日尚鴻濛王霸雌雄一笑中
他時憶我羅浮頂可有風雲起伏龍

東湖走筆寄詹明府

東湖水似鏡湖水一片荷花不見天更有荔支千萬樹
離離朱實含霞鮮孔雀銜過水簾去有時落在美人邊
彭洞繽紛灑冰雪羅浮縹緲飛雲烟主人乃是名吏部
風流日日蕩湖船朝從蘭若求支遁暮向檀槽覓小憐

畢卓已多甕頭酒山公還有竹林賢竹林之下誰名飲
興來我亦清狂甚醉臥當壚紅粉旁落花無數沾衾枕
長嘯一聲遠寄君君在浮丘聞不聞漆園傲吏爲蝴蝶
勾漏仙人擁白雲

答姜十三送遊天台之作

昔我隨遠公幽居廬山南香鑪峰下水濯遍十三潭松
蘿花開覆盤石臥視秋雲天外白秋雲舒卷本無心忽
向天台弄素琴逢君散帶耶溪上贈我幽蘭積雪吟我
有雙白雀欲放沃洲山朝啄蒼梧之珠塵暮隨明月東
海還期君來聽九臯唳天籟清寥非世間

淶水曲

二月鏡湖春桃花開玉津無數紫鴛鴦飛繞浣紗人浣
紗殊未返搖曳春雲晚月出白蘋洲烟生垂柳岸垂柳
依依在月中可憐嘶斷玉花驄輕風忽引羅衣去一曲
菱歌聽未終

將歸東粵省母留別王二丈亶祁四丈駿佳

磨劍未屠龍彎弓未射虎折鬱英雄恣念我有慈母白
雲東去復西飛萬里羅浮今又歸白雲散盡露秋月照
見高堂鬢如雪鬢如雪兮我心憂孤鸞朝飢鳴啾啾惟
爾仙人居射的可有玄梨應我求錢塘之水入澥流蒲
帆朔朝去悠悠回首山陰最相憶骨青髓綠園綺儔只
將一片盤龍鏡長挂君家十二樓

有所思

我有花宮在羅浮水簾千尺懸滄洲仙人教我吹玉笛
一曲未終鳳來遊鳳兮皎若峨眉雪口啣芙蓉向丹穴
因之萬里蓬萊飛回首故都心斷絕心斷絕兮不能持
故都禾黍已離離折盡扶桑拂日枝重華何處就陳辭
曾將玉珮投湘浦欲采珠塵向九疑九疑聯綿在何處
斑竹陰森山鬼語明月中宵出洞庭照見皇英之二女
瑤瑟聲聲怨別離霓旌颯颯吹風雨白龍魚服幾多時

玉殿淒涼仗數移將相幾人留島嶼君王何日出蠻尼
可憐五色飛龍馬無繇扈從到瑤池落花寂寂愁獨處
浮雲渺渺長相思

會稽春暮酬南海陳五給諫懷予塞上之作兼

寄西樵道士薛三

我家扶桑下日日見東君遺我紫瓊花風吹落白雲白
雲決滂起南海蓬萊宮闕須臾改往日三千玉女羣祇
今惟有麻姑在與君攜手入羅浮瑤琴一曲難消憂綺
季終當扶漢室張良未得報韓仇君家相國奮長劍曾
捧軒轅出金殿嗚嗚吹角爲龍聲大呼玄女來助戰蚩

尤未滅妖氛多可憐碧血歸天河君棲蘆中凡幾日悲
風吹斷鵲鴿歌神虬久蟄無人識黃鵠高飛奈我何高
飛忽向天山月月照天山皎如雪丁零爭獻葡萄杯蘇
武共持青海節鴻雁南從大庾回口啣尺素落龍堆開
緘未讀淚沾臆城上吹笳淒且哀處處牛羊銜白草紛
紛雨雪下輪臺問君塞上胡不來當時勅賜有龍媒投
筆曾無班子志吹篴寧讓伍胥才新詩字字瑯玕重何
時草就西樵洞西樵道士劍俠流應共悲歌擊銀甕春
風三月梨花飛我遊禹穴方思歸黃鶯關關啼碧柳萬
里鄉心連翠微誰憐寂寞耶溪上淚灑西施金縷衣

春日懷白華園

櫻桃花發吳溪香客裏看春黯自傷可憐海燕差池羽
挾子翻飛過画梁我家遠在番禺縣此日春人事遊宴
翡翠城邊柳正垂琵琶洲畔鶯初轉舊栽梅樹玉堂邊
我母折梅大士前松風隔水吹朝梵山月含霜照衣禪
一別鄉園經四載浮雲舒卷瀾滄海五色明珠不肯投
千金七首依然在紛紛天下逐雌雄安期在去說重瞳
仙人本爲蒼生出大道難令濁世容楚客空知笑衰鳳
葉公不解好真龍徘徊岐路將何適采采芳蘭三歎息
弱弟雖承菽水歡鮮民未盡耕漁職鴻雁飛飛向塞天

誰憐落羽屢驚弦戈人應念銜書苦萬里飄零非偶然

贈張損之

秦淮之水連青谿君家芙蕖出水齊性好丹青作花卉
含毫多在蓮葉西張顛白日老閒事中散青霞鬱奇意
画出芙蕖天下無葉葉花香撲鼻舊院風流往日多
沙嫩清簫傳壽歌齊梁艷曲爲君唱求画芙蕖日夕過
長板橋邊明月滿脫家十娘開別館棗花簾子捲晴雲
邀画芙蕖香更薰千錢一幅傳都市一時好手誰如君
只今王謝俱冷落青樓歌舞不復作桃葉渡頭空夕陽
東華園裏無紅藥君家寂寞在溪湄南朝逸老無人知

頤楊二姓紅顏盡那有犀簪供画師君且據梧復隱几
繁華銷歇無多悲

寄薛二

君戴芙蓉冠幾日羅浮返芝房白玉童應笑學仙晚我
在天台讀道書春風三月悵離居盈盈一片流花水欲
共琴高駕鯉魚

東西二樵山有如日與月相望不相知夢魂常恍惚四
百餘峰高復低難將七十二峰齊飛橋恨不長千丈朝
向東樵暮向西

東樵四百三十二
峰西樵七十二峰

酥醪村作

梅花村北酥醪村家家爭釀梅花魂梅花與酒一時熟
香吹羅浮當朝瞰山人嗜酒日沉酒醉來跌破蒼苔痕
大嚼梅花貪醒酒消渴之藤窮株根麻姑酒田亦不遠
往來壚側常鯨吞麻姑要詩作酒價一篇動揮千萬言
撫掌大笑李太白眼花落井空昏昏酒星墮地不歸去
化爲酒泉長崩奔文章亦與酒泉似波濤洶湧傾龍門
白頭潦倒每一石螟蛉果羸淳于髡呼吸水露作玄碧
驂駕颺車凌崑崙

追答王學士廬山篇見贈之作

我昔廬山尋瀑布香爐峰上披烟霧白雲無事早知還

欲共淵明奮高步淵明醉石橫溪邊九疊屏風三疊泉
飲酒正憐重九日聞鐘忽悟遠公禪吾心皎皎如秋月
照映寒潭無可說何妨變化若浮雲自有光輝含積雪
沙門束教非高士吾今况尚爲人子養母宜耕十畝田
求人欲著三朝史簡君舊贈廬山篇廬山回首淚潺湲
遺民此日成通隱嘯傲王侯亦偶然

聽琴歌

匡廬瀑布三千尺飛入琴中如霹靂蘇門仙者聽無聲
一任崩雲并裂石嶧陽桐樹爾何求不遇簫韶返故丘
明月從來不妄照孤雲何事亦群遊

西峯訪范復菴不值留贈

橫天一壁驚無路頻騎夾嶺空中度棧邊萬壑沉青冥
橋下千峯出烟霧我從玉井得真源明星玉女招不顧
直向西峯攀所思樓壓蓮花花倒垂三閭披髮同山鬼
四皓療饑有紫芝咫尺白雲尋不見先朝耆舊君堪戀
無悲帝座隔層城自有天門通一箭

西峯下窺水簾洞作

玉井潛流爲瀑布諸峯噴薄如烟雨天風吹斷水晶簾
似見投壺諸玉媵河漢縱橫難爲梁欲度不度愁參商
石髓金精不我與銀臺玉室徒相望山鬼幽篁悲晝晦

美人其雨怨朝陽行歌散髮且徜徉

洗象行

玉河六月河水長朝廷舊典賜洗象昆明不見舊樓船
太液何來新甲仗傾都觀者皆歡娛宣武門外鋪璫瑜
公子踏花紅叱撥佳人障日錦屠蘇須臾前導執金吾
二十四象天街趨龍旂送出千門柳羽騎迎過萬歲湖
花牙潤潔體雄詭橫行鬱若近山徒自是瑤光星降精
惟有神龍力可比夜郎蠻奴馴習者手握銀鈎左右下
騎入洪波走巨魚突出平沙驚萬馬水花瀕洞濺浮雲
兩邊金鼓鳴虎賁似逢光武昆陽戰如彼吳王水犀軍

萬人喧呼動城闕一片紅塵污水雪爭道驂駟擁御橋
兩行燈火侵宮月白頭中使偶相逢三朝腰玉賜穿宮
謂余此象養天廐當年捧與將軍同曉披瓔珞朝皇極
秋駕鑿輿出喜峯去歲雲南師收績象兮曾與沮渠敵
周王八駿去何之夏后兩龍歸未得可憐蠨嶮虎豹姿
雖飽膏粱淚沾臆

雷陽郡齋醉中走筆呈吳使君

使君風流世所宗飲酒不醉真酒龍一麾出守頻海郡
三年坐嘯擎雷峯有一酒狂人不容聞君新醅荔支濃
沉香觥船大如斗中有屣沙嫩鹿茸香狸之脯沙魚翅

玉盤行出和春蒸使我采頤不能已番禺千里來相從
仲秋月照郡齋夕轟飲吏人俱辟易鯨魚自合乾百川
鼯鼠猶能盡一石玉山忽倒紅羅瑜談禪交吐夜光珠
嬌歌婉轉東西和花且溫柔左右扶英雄達生無不可
一代糟丘今屬我古來賢聖盡浮雲豈必二豪同螺贏
昔人酒中誰陸沉阮公一醉直至今酣放動經六十日
千載惟公知此心

高州大水作

天決鑑江灌高涼一夕水高三丈強西南二門白晝閉
外愁汪洋大雨滂沱不得止颶風吹倒牛與羊

千家號哭萬家走婦子盡同魚在罾白波捲去南巴城
烟火不知何處有蛟龍拔木山欲摧潭中驚出雌雄雷
狂夫欲渡不得渡中流浪打披髮回二村已遭白牛陷
挺劍我欲爲澹臺斬盡水怪無凶災

奈何帝歌

陳后主將亡國鍾山羣鳥翔鳴曰奈何帝奈何帝
何帝

奈何帝奈何帝風流亡國亦足豪美人相抱井中墜可
惜井中水不深美人不死傷我心淚痕化作胭脂痕千
秋漠漠苔花侵苔花侵美人墓在青溪陰不死胭脂死

青溪可憐不作井中泥國亡不恨恨惟此山河不易一
女子

放歌行爲潘子壽

丈夫五十髮未白痛飲狂歌真可惜神仙富貴兩蹉跎
徒作諸侯一賓客尉陀城南十月時梅花開早菊花遲
與君往往談王霸笑殺當壚嬌女兒我在山中無素業
清高亦與屠沽接道成不肯居神仙氣使翻然作遊俠
英雄自古一浮雲求道應從鸞雀羣有金且買東方妾
有酒且醉信陵君縱心寫意無不可聲色之中知是我
天生我輩自長生不似二豪爲蝶羸

題周梨莊戴笠圖

梨莊本是青雲器四十于今猶未仕前朝文獻在君家
著作欲繼先公志秣陵藏書誰最多讀西樓中高嵯峨
据拾能箋五代史時談遺事如懸河董狐有志我未逮
三百年中誰紀載漢史應須屬紫陽元人豈解尊昭代
青溪水閣閒相期筆削相將乘此時王猛猶能存正朔
許衡那得配先師栖霞之山好林樾更爲同人開理窟
片言亦可成春秋一畫自能知日月閒來戴笠將何之
遺谷逍遙若有思接輿髡首且相對徜徉于道亦良宜

讀李耕客龔天石新詞作

東風吹愁滿天地越客羈栖不得意携家遠自南海來
寸口飄飄無所寄秦淮一曲且僑居升斗之水愁枯魚
故人咫尺在幕府慰我饑渴三致書公子多才年復少
樂府能兼南宋調風流初見藕莊詞與君宮體皆娟妙
我方箋易臨河樓夢寐日與羲皇遊新詞見贈不遑答
精微空向畫前求南楚好辭宗屈子學詩昔自離騷始
含風吐雅數千篇美刺頗得春秋旨艱難持向清涼臺
一秋不視白魚來聖賢自古皆寂寞文章于我誠塵埃
爾君新授春秋疏欲爲唐人傳啖助多金鏤得授經圖
功在泥山流美譽交廣春秋我亦成南方異物多經營

陸賈山川未作紀嵇含艸木徒知名長跪幾時能請教
知君博物有深樂花中錦繡足文鴉果下金錢饒小豹
收香書帶與相思賦咏惟君綵筆宜我愧江淹才欲盡
那能倡和及芳時

女兒葛歌

女兒十三髮覆額精工善作女兒葛花針挑出葛絲絲
織成蟬翅弱霏霏一端祇得三四銖出入筆管輕且微
十年一匹不滿機製爲夫婿乘涼衣日炙葛絲皺風吹
葛絲舊兒郎惜葛絲莫當風日走寧無綺與羅是儂手
所就

送洪氏兄弟讀書黃山白龍潭

松松倒懸數千尺身似藤蘿纏怪石有時怒隨雷雨飛
三十六峯腹盡坼洪生兄弟性愛松讀書各據一芙蓉
黃山本是白雲海松樹大小皆神龍羅浮七星松名作道
士邀予每道神仙事繇來變化本無情性盡自然天命
至汝師汪子在天都曾見軒轅得道無莫浴湯泉生羽
翼且將石笋作擣菹言兵寔自軒轅始八卦神機連甲
子峯峯布列是陣圖白雲出沒爲旗幟陰符不用更鈎
深象數之中總可尋讀易自應知戰法裁詩且復遣愁
心

石公種松歌

石公好寫黃山松松與石合如膠漆松爲石笋拂天來
石作松柯橫水出涇西新得一山寺移松遠自黃山至
髯猿一個似人長荷鋤種植如師意師本全州清

湘山湘水別多年全州古松三百里直接桂林不見天
湘水北流與瀟合重華此地曾流連零陵之松更奇絕
師今可憶蛟龍顛我如女蘿無斷絕處處與松相纏綿
九疑松子日盈手欲種未有白雲田乞師爲寫瀟湘川
我松置在二妃前我居灘南憶湘北重瞳孤墳竹嫵娟
湘中之人喜師在何不歸掃蒼梧烟

九日過李十一二者山房賦贈

白晝婆娑古樹下華堂無事招儒雅蘇門高士過彈琴
天寶將軍來画馬此日重陽黃菊開寂寥餘我登高臺
被髮狂遊人削跡持觴高論爾憐才江山戰後秋無色
天地窮陰消不得周王兵士化沙蟲漢代衣冠委荆棘
君家殉國有難兄散盡黃金事不成春令空抱萇弘血
鴻雁猶吞伍尚聲我在山中無素業一遇屠沽歡笑接
道成不屑居神仙氣使翻然作遊俠爲君題詩花萼樓
羽聲慷慨誰不愁

西樵歌

西樵山何聳峙峩峩之孫羅浮之子霞城乳竇碧玲瓏
千尺珠簾挂秋水仙闕遙開白石邊人家盡在桃花裏
我尋羽客到錦巖盤旋磴道上松杉月明一嘯驚鸞雀
飛入青冥瀑布南

藥地禪師于青原得一瀑布名曰小三疊泉請

予題長句

聞道青原新瀑布奔飛絕似匡廬山匡廬瀑布推三疊
一半移來烟霧間大士無心偶開闢挂出晴川數千尺
說法無心玉塵揮日夜雷聲喧石壁康王谷裏水簾長
玉鏡潭前白練光昔予散髮卧其下灑面冰花涼復涼

黃巖更比石門好香山亦有銀河倒天風吹斷落彭湖
散作金波千萬道平生最愛是飛泉處處飛泉弄紫烟
天台雁宕都奇絕未若青原更可憐

浮丘修禊作

朱明門戶是浮丘浮丘丈人昔此遊采藥相携浮丘叔
時從洞裏入羅浮挹袖堂前花幾處春光一望消愁緒
雲霞十里蜃樓臺錦繡三城龍子女今晨上巳是佳晨
與客傾壺坐艸茵偏霸不須爲武帝清狂日復作仙人

客山陰贈二祁子

君家樓閣鑑湖邊楊柳千條春色妍疎牖朝開射的雪

空簾暮捲香爐烟閒擁牙籤披萬卷少謝風流詩更善
可憐初日吐芙蓉更有澄江飛白練我從羅浮萬里來
逢君文采一徘徊天上雪花那有帶雲中玉鏡不安臺
相留暫向祇園住正是中丞殉節處碧水含秋似汨羅
黃金布地同玄度櫻桃開遍画闌干揮塵鳴琴興未殘
半山每答猿公嘯千仞將瞻鳳鳥翰鳳鳥高飛何所止
金陵宮闕五雲起一鳴素水降真人再鳴留侯遇松子
羅浮探梅歌爲臧喟亭作

羅浮梅花天下聞千樹萬樹如白雲開時花似玉杯大
枝枝受命羅浮君么鳳一食三百朶綠萼檀香留與我

君來先到梅花村重夢美人君不可四百峯間開更開
花從舊帶作新胎今歲雪多添一瓣去年霜少盡重臺
玄墓西溪花百里可惜天寒香似水炎天氣暖長氤氳
生熟水沉作鬚蓋不到羅浮爭得知梅花自此長相思
化爲蝴蝶車輪大歲歲來攀太古枝

望夫石

二禺之峯七十二中有石人立蒼翠望夫化作石嵯峨
留取貞心在天地石公石姥洞庭西合體休垂雙玉啼
安得郎歸亦化石白雲深處長相携無情化石石難好
有情化石石難老郎歸會見石能言招手天邊待相抱

玉女峰觀洗頭盆作

東峰傍削一高臺玉女嘗乘白馬來玉盆潛通黃河水
鬢髮沐罷光徘徊我來日月蕩精魄飛蓬自愧無膏澤
黃凌昔戀湘君祠太華今憐玉女宅聖賢發憤詩三百
風雅洋洋多好色公子應知憔悴人三閭非是荒淫色

題王山史獨雀亭

仙人騏驎是胎禽千歲丹砂入頂深聞爾浮丘能相雀
孤飛忽至華山陰華山三峰削青天白帝金精育大賢
黃河萬里入胸臆文章一瀉如雲烟我本羅浮五色鳥
化爲仙人出炎嶠狂歌不逐衰鳳遊高舉時蒙斥鷃誚

聞君好雀雀亭居九臯清嘆爲君娛攜持杯杓來相就
驂駕烟霞遂共驅共驅直向華山巔雀兮起舞何翩翩
衣裳皎若玉井蓮何殊玉女臨樽前

丙午夏日將同李天生之雁門道過蒲城飲米
侍御園亭卽事有賦

蒲城六月火雲高行人飛鞚尋東臯大夫射雉有遺處
臺榭陰陰風雨聚金粟堆南問二陵堯山谷口迷千樹
主人驄馬早歸來敕賜芙蓉對客開前席少年籌漢罷
上林高士望京迴驚鴻流雪慰摧頽醉揮漫水入金杯
同心藕使冰盤滿並蒂花教玉管催織女多情銀漢度

匏瓜無匹心相妬矢志聊爲聲色荒求仁不被神仙誤
歌長燭短夜無多明朝秦晉阻黃河雁門深入胡天雪
回首西方憶綺羅

古丈夫洞草堂歌

并序

歲丙午之春予遊西嶽於北斗峰得三洞
曰古丈夫洞一曰毛女洞心甚喜之將結草
堂於其間以爲華山自青柯坪北至三峰其
壁之穿而爲坎者可容趾二分爲領者容指
二分用指之力嘗多於趾歷千尺峽百尺峽
老君羣溝仙人砭蒼龍嶺諸處雖絕險峭然

皆遊人必經之路而此二洞在嶽西絕壁間
可望而不可卽遊人必不肯枉道以問焉吾
結草堂於其間是天之所私以與我也且是
洞又曾爲古丈夫毛女所棲夫古丈夫秦之
賢者以始皇滅二周之故遜入西嶽而毛女
玉姜爲秦宮人亦以秦無道負琴而入西嶽
與古丈夫服松葉飲泉以老吾之所遭庶幾
古丈夫之時而吾妻秦女也亦慕高隱今結
草堂於二洞與吾妻踐古丈夫毛女之迹則
斯二洞也前有古丈夫毛女後有吾夫若婦

天之生斯二洞爲不虛使志西嶽者采之其
爲可傳何如也且吾昔者爲西嶽詩百韻秦
人李天生見而悅焉持以爲蹇修吾故得吾
妻夫昔以西嶽得妻今以妻還之西嶽西嶽
之大有造于予安可忘哉於是予更字曰華
夫而吾妻曰華姜草堂旣成華夫種古丈夫
之松柏華姜彈毛女之琴人望之咸以爲仙
華夫笑曰否否乃爲草堂之歌曰

丈夫非仙人毛女亦高士相攜向白雲欲學采薇子天
生兩洞如鴛鴦西臨太華東首陽女蘿飛花蔽洞口雙

棲人在洞中央草堂之中何所望有美一人持玉漿巨
靈掌上石樓長水簾捲起見明粧草堂之中何所服石
髓金精滿巖谷古松千歲吐奇光夜如荷花晝牛日

雁門送客

君在雁門北我在雁門南雁門八月紛霜雪何事征夫
繫玉驂桑乾水遶長城遠句注山舍秋色晚塞女吹殘
簾築聲舉杯勸爾江南返江南春色在君家早將妻子
別龍沙樓臺更向秦淮曲日對天桃幾樹花

送孫丈歸黃山

君何不向黃山歸君家有松大十圍松外一天雲氣濕

松間百道瀑泉飛我思三十六翠屏復愛松兮長青青
安得隨君入杳冥君爲兔絲我茯苓相與松兮至于齡
去年東嶽兼西嶽來往真如天際雲今日黃山遊不得
三十六峰空待君君歸好向湯泉浴會見骨青而髓綠
容成教以駐年方服食虛無坐紫牀道成相與隨軒皇

登秦望山寄謝廬山無可大師

秋風忽起飄井桐白鳳西飛紫鳳東何處思君更淒斷
流泉潺湲秦望峰秦望高兮烟靄重我持明月照鴻濛
雲間夏后金書在松下秦皇玉輦空遙望廬山倚南斗
三石梁邊君隱久陰符寶劍與何人玉塵青蓮應在手

幾宵乘月彈瑤琴寄我瀟湘帝子
唵梅花亂落雲門寺
經歲相思未嗣音此日登高眺東
曩日出天台佳氣在
黃屋將浮碣石來紫芝尚向商山
采紫芝兮使心愁
功名讓與屠沽流仙人肌體如冰
雪姑射山中自可留

送方瞳子

家本羅浮上仙人日往還就中勾
漏令侶爾芙蓉顏笑
蓉顏兮誰不悅朝如丹霞暮如雪
弄玉來教紫鳳簫靈
娥照呂瑤臺月月出瑤臺奈樂何
忽乘天馬超天河遊
遊毋共東方朔功業聊爲馬伏波
千金買得魚腸劍七
寶裝成獅子花天下侯王猶草澤
江東子弟已干戈問

君望氣意如何五色龍文嵩雒多
我作班彪王命論羣
雄不敢思并吞赤眉必有長安敗
王莽終遭宣室焚自
古帝王盡天授雲臺諸將羅星宿
子房本是赤松流漢
家乃繼唐堯後春日張筵戲馬臺
千枝芍藥送春來燕
姬競作蓮花旋羌笛齊吹阿鞞迴
慘淡風雲歸浦上蒼
茫淮解入金杯看君醉後揮鞭去
颯颯龍沙萬里開

送吳少叅返歷陽

天作天門夾大江君邊蒼翠濕秋
牕西梁煙接東梁雨
看殺芙蓉第一雙蘭橈曾繫君楊
柳鶯向春人催飲酒
沿月頻過采石磯乘潮直出鮎魚
口江北煙花是歷陽

君歸爲樂正多方謝公陶寫憑金管太白風流在玉觴
養壽豈須紫芝草忘情自令朱顏好文章已可得長生
况有醉鄉縱懷抱

惠州王太守入羅浮尋梅花村不得用子瞻松

風亭下梅花詩原韻有作予爲和之

水簾洞口梅花村梅花不見餘冰魂美人已隨明月沒
依稀縞衣來黃昏翠羽啾嘈怨幽谷白雲黯淡愁荒園
使君苦尋千萬樹一冬衝雪忘寒溫急需更植徧巖壑
依之吐納扶桑暎盡教玉女插雲髻復爲老人遮松門
千秋梅花作湯沐四百君當聞此言一羅一浮再開闢

花時招我傾清尊

廣陵老僧聞一以畫扇見貽詩以答之

聞一善琴

老僧能琴復能畫八十四齡何瀟灑扇頭貽我瀟湘景
髣髴聞有飛泉瀉乞師卽來一鼓琴移將萬壑寒松林
霜鐘一醒青蓮耳流水長清太白心

合江樓讌集次蘇長公韻

王使君出寶坻家釀飲客

洋洋乎水何美哉合似羅浮不復開天下朋友之膠漆
安得盡似雙江來登臨風日正清長嘯休驚鷗鷺起
使君醇醪自寶坻傾作金波逐江水一杯明月一杯新
明月笑我非仙人仙人未有不飲者更須沉湎羅浮春

草書歌贈藍公漪

公漪愛我草書好画成卽遣作今草角扇屏風總不辭
龍蛇飛動爲君掃古來草聖稱張芝神變無方吾所師
點畫精微盡天縱豈惟勁骨兼豐肌二王筆精復墨妙
思極天人無不肖率意超曠我亦工研精體勢未知要
漢人遺法久無傳用筆從來貴極圓懷素頗得草三昧
夏雲隨風任盤旋米芾神鋒每大峻大黃遠射力愁盡
張旭顛草雖自然亦傷雄壯終非晉我今學草常苦遲
未能變化猶矜持裙滑無多羊氏練水清安得伯英池
伯喈作書必純素欲購千端無毫兔仲將如漆墨盈箱

左伯光妍紙無數爲君亂作一筆書心手竒冥隨所如
蛟龍拏攫恣天矯驟雨飄風教六所穠纖折衷更精熟
每日淋漓須百幅君之散隸亦入神以之相易須神速
君有尊人草篆精凡夫趙氏同飛名故君法書具清識
感激知己深余情筆力會當友造化安得閉門日多暇
右軍筋骨益精心與君八分早相亞

南海神祠古木綿花歌

十丈珊瑚是木綿花開紅比朝霞鮮天南樹樹皆烽火
不及攀枝花可憐南海祠前十餘樹祝融旌節花中駐
燭龍啣出似金盤火鳳巢來成絳羽收香一一立花鬚

吐綬紛紛飲花乳參天古幹爭盤拏花時無葉何紛葩
白綴枝枝蝴蝶繭紅燒朶朶芙蓉砂受命炎州麗無匹
太陽烈氣成嘉實扶桑久已推爲薪獨有此花擎日出
高高交映波羅東雨露曾分扶荔宮扶持赤帝南溟上
吐納丹心大火中二月花開三月葉半天飛落人爭接
東風亂剪猩紅絨兒女拾來柔可摺正及春時百谷王
神靈不使馬蹄蹀還憐飛絮白如霜織爲縹布作衣裳
銀釵叩罷雙銅鼓歲歲看花水殿旁

伶俐江口遇風作

北風吹舟衝石壁我篙競下如拒敵夾岨溟濛沙亂飛

中流洶湧石相擊舟破定知觸鬼神檣折有聲如霹靂
風狂豈可滿帆張長年不戒使我傷忠信寧憂白頭浪
笑談曾渡蓮花洋不須彎弓射潮水且復橫槩賦詩章

短歌贈別陳子

丘園著書久寂寞茫茫周蝶誰先覺虹霓爲帶佩華星
欲舍愁心遊五嶽五嶽迢遙路不通何如高臥謝鴻濛
仙人祇在玉壺裏無爲之化在重瞳伯樂無煩治天馬
藐姑不待御飛龍

讀杖人師武夷遺草因懷武夷虎嘯洞諸勝

我昔遊五嶽身騎二茅龍驚風忽然起東海日月吹落

金銀宮愁將白髮三千丈歸去朱明四百峰朱明洞裏
多仙客餌我雲母顏光澤時偕玉女侍軒轅不共安期
千項藉聞鐘又復證無生足踏空王頂上行冲霄一劍
如秋水徹夜雙簫響太清飲光尊者頻招手飄然遂至
鳳凰城尊者玉毫何宛轉手把芙蓉微笑展可憐樓上
相見時玲瓏秋月珠簾捲江南亂後草離離回首青山
愧我師未將電足酬支遁空對冰絃憶子期當時語我
武夷好九曲清溪流浩浩接笄峰前多紫雲飛猿嶺上
饒芝艸幾度安禪在翠微天花繞座鳥啣飛芋戶只今
委苔蘚嗟予振策何時歸空讀遺書開玉篋太山頽矣
傷何及姑射仙人不降生茫茫天下皆臣妾蘇門一嘯
如鸞音散入天風不可尋憑將寄語武夷客會取高山
流水心

送李十還晉康山中

尚平五嶽遊初返四十爲農殊未晚安得田園湖海傍
朝朝暮暮雕胡飯晉康山水天下稀君家洞口泉爭飛
文章自可娛慈母富貴繇來在布衣君行爲結松間屋
相待明秋住翠微

羅浮放歌

羅浮山上梅花村花開大者如玉盤我昔化爲一蝴蝶

五采綃衣花作餐忽遇仙人萼綠華相攜共訪葛洪家
鳳凰樓倚扶桑樹琥珀杯流東海霞我心皎皎如秋月
光映寒潭無可說臨風時弄一絃琴猿鳥啾啾悲楓林
巢繇不爲蒼生起坐使神州俱陸沉

木棉花歌

廣州城邊木棉花花開十丈如丹霞燭龍銜日來滄海
天女持燈出絳紗樹樹雙棲孔雀暖枝枝交映扶桑斜
仙種珍奇世希見受命天南絕霜霰漢帝曾栽扶荔宮
越王爲造珊瑚殿月下紅侵舞女衣風前香繞留仙宴
回首春深怨杜鵑榮華寂寞淚潸然殘英化作天山雪

飄落胡人玉笛邊

張二丈畫馬送予出塞詩以酬之

我棲羅浮四百峰十年學道師老龍忽覩扶桑上紅日
真人飛出蕊珠宮邇來劍得白猿術登臺嘗舞雙芙蓉
清泉白石心已厭慷慨欲遊關塞中憐君少小事遊俠
智勇深沉慕荆聶悲來每叩玉壺歌酒酣頻向南山獵
平生画出真驂騮將尋天子崑崙丘萬里風沙開縞素
千羣汗血騁王侯今朝聞我天山去停杯不覺淚如雨
可憐陌上握別時桃花亂落黃鸝語黃鸝覘皖不堪聽
離家去國怨孤征白草連天過鹿磧黃雲蔽日向龍庭

不是摩騰取貝葉將同介子持長纓歎君五十無知己
黃金散盡慚妻子不能仗劍遠相從猿肱燕頤徒爲爾
空將秃筆掃龍媒送我直上單于臺神駿已居曹霸上
鷹騰肯讓衛青才紛紛世上皆凡馬如此騏驎空冀野
爲君攜出玉門關戎王應奉千金價秋夜懸軍瀚海西
哀笳吹月馬頻嘶此時思爾茅堂裏賦就饒歌待客歸

那旦道中作

孟秋九日寒無比東西南北颶風起陽春道上不可行
吹我僕夫僵欲死有車旣陷泥淖中有馬亦倒溝渠裏
雨挾驚沙撲面飛征人濕透苦無衣黑雲一片橫天盡

紅葉千重見日希登高四望無烟火白石蒼苔滑殺我
但得天晴到夕陽自有人家當道左

烏江弔項王

力拔山兮天下雄氣蓋世兮乃無終王以天下兮三讓
不然漢高無大風一讓兮不殺沛公鴻門不追至軍中
始驅除兮終拱手禪授之德真重瞳再讓兮不都關中
天府捐棄咸陽宮故鄉彭城不忍舍鴻溝爲界來相攻
三讓兮不渡江東江東吳越地未空八千子弟倘復起
夫差句踐霸可同江濤怒兮水倒立大野吹兮多落楓
時不利兮騅一蹶天之亡我命當窮死生與虞同一命

蛾眉血兮濺衣紅王多情兮不負季視季亦與虞兮同
還定三秦忽失約季負王兮季非忠不殺義帝季亦殺
三軍縞素欺愚蒙英雄豈必皆好信勢便逐利如轉蓬
三傑不言復讐事董公遮道計殊工吳芮不殺王不服
弑君之賊乃有躬義帝無後漢不立漢之寡恩誠不聰
英雄成敗兩不義誰言天授非人功吁嗟誰言天授非
人功

送朱上舍

汝兄嶠南來可憐故人不得相周旋臺門咫尺邈千里
相知何苦相天淵汝今又歸桐鄉去臨分那得無纏綿

嘉禾我友十餘輩汝兄第一膠漆堅管谷已往墓木拱
武功廣漢皆黃泉平生知己在梅里白頭存者多迤邐
汝行爲訊繆天自二李伯仲應歸田徐家復有磨鏡者
季也亦誠生芻賢鴛湖一別動廿載人生倏忽真浮烟
富貴非時自知隱文章無命誰求傳戀君一步一握手
賦詩金石聊相宣汝才崢嶸亦奇闢開元大曆羞比肩
參差似兄騰笑集墳箎同開風氣先逃唐歸宋計亦得
韓蘇肯讓揮先鞭大雅只今久淪替吾衰難起黃初前
老豈爭名向輕薄自來可殺惟青蓮苦心經術作書壺
吾經縱橫情所便春秋已知非筆削大易亦謂無方圓

十翼思返仲尼舊三傳欲將公穀捐詩歌末藝任工拙
漢儒章句方拘攣壯心慷慨尚復爾時時自苦明膏煎
葛公中華倦游步龍光欲騁聊高眠故人倘詢英霸器
爲語奇雅猶芳年

兄謂
竹垞

愚翁山詩集卷第二

